

## 每週經課朗誦經文(巴克禮台語漢字)2012/11/04

### 共同經課 - 1

#### 以賽亞書二十五章六節～九節

6 佇此個山，萬軍的耶和華欲爲著萬百姓用好物排設筵桌，用舊酒及骨髓滿滿的好物，以及坐清的舊酒，排設筵桌。7 閣佇此個山伊欲除去罩萬百姓的帕及遮蓋萬國的布篷。8 伊有吞滅死無到永遠。主耶和華欲拭去眾人面裡的目屎，閣對普天下除去伊的百姓的見誚，因爲這是耶和華講的。9 到彼日，人欲講：「看啊，這是阮的上帝；阮平素聽候伊，伊欲拯救阮。這是耶和華，阮平素聽候伊，阮欲因爲伊的救恩來歡喜快樂。」

### 共同經課 - 2

#### 詩篇二十四篇

1 [大衛的詩] 地及其中所充滿的，世界及踮佇伊中間的，攏屬耶和華。2 伊將地建立佇海的頂面，安置佇大水的頂面。3 是誰會上耶和華的山？是誰會倚佇伊聖的所在？4 就是手清氣心清潔、存心無向虛假、咒誓無因奸詭的人。5 此號人欲得著耶和華賜福，閣對救伊的上帝得著義。6 諸個是尋耶和華的族類，雅各的上帝啊，這是愛見你的面的人。(細拉) 7 城門啊，抬起恁的頭！永遠的門啊，恁著受舉起！榮光的王欲入！8 彼個榮光的王是是誰？就是大氣力大權能的耶和華，佇交戰有大權能的耶和華！9 城門啊，抬起恁的頭！永遠的門啊，恁亦著抬起！榮光的王欲入！10 彼個榮光的王是是誰？萬軍的耶和華，伊是榮光的王！(細拉)

### 共同經課 - 3

#### 啟示錄二十一章一節～六 a 節

1 我閣看見有新的天新的地；因爲前的天前的地已經過去，海也無閣有。2 閣看見聖城就是新的耶路撒冷，出佇天，對上帝降落，已經備辦便，親像新娘妝飾來聽候伊的丈夫。3 閣聽見大聲對座位出講：「上帝的會幕佇人的中間。上帝欲及 in 相及倚起，in 欲做伊的百姓。上帝本身欲及 in 佇啲，來做 in 的上帝。」4 閣欲給 in 的目睭拭去攏總的目屎；無欲閣有死失，也無欲閣有哀傷、喉叫、痛疼，前的代誌已經過去。」5 坐佇座位的講：「我換新萬物！」閣講：「你著寫伊；因爲諸個話是通信，是真實。」6 閣給我講：「已經成啦！我就是阿利法及奧美加。」

### 共同經課 - 4

#### 約翰福音十一章三十二節～四十四節

32 馬利亞到耶穌所佇啲的所在，看見伊，就仆佇伊的腳下，給伊講：「主啊，你若佇遮，我的兄弟就袂死。」33 耶穌看見伊啼哭，閣及伊相及來的猶太人亦啼哭，就真感心，34 閣大茹亂，講：「恁下伊佇甚麼所在？」in 就給伊講：「主啊，來去看。」35 耶穌流目屎。36 猶太人就講：「你看，伊疼此人到按呢。」37 其中有的講：「伊曾開晴暝人的目睭，豈袂互此人無死嗎？」38 耶穌閣感心，到墓裡；彼個墓是石洞，有一塊石塞下啲。39 耶穌講：「徙開彼塊石。」死人的姊妹馬大給伊講：「主啊，今臭啦，已經死四日啦。」40 耶穌給伊講：「我豈無給你講，你若信，會看見上帝的榮光嗎？」41 in 就徙開彼塊石。耶穌抬目向天，講：「父啊，我感謝你，因爲你已經聽我。42 我知你常常聽我，獨獨我講按呢是爲著周圍啲倚的眾人，互 in 信你差我。」43 講息，就大聲喉叫講：「拉撒路出來！」44 死人就出來，手腳紮布，面包巾。耶穌給 in 講：「解開互伊行！」